

Umsögn um drög að reglugerð um hrognkelsaveiðar árið 2020

Varðandi 2. gr.

„Fiskistofa auglýsir, fyrir 15. janúar, eftir umsóknum um leyfi til grásleppuveiða og skal umsóknarfrestur vera til 15. febrúar 2020. Umsóknir sem berast eftir þann tíma eru ekki teknar til greina.

Umsækjandi skal í umsókn greina hvenær hann muni hefja grásleppuveiðar með lagningu....”

Þessi hluti 2. greinar er algjörlega ótækur. Að þurfa að ákveða með viku eða mánaðar fyrirvara eða þaðan af lengra hvenær veiðar hefjist. En veður og fiskgengd hafa úrslitaáhrif á þessa tímasetningu.

Varðandi 3. gr.

„...Ráðherra er heimilt að fela Fiskistofu að fella úr gildi leyfi til grásleppuveiða sé talin ástæða til að takmarka veiðar eða endurskipuleggja stjórnun þeirra.”

Hvað er Ráðherra að fara þarna? Þetta er gríðarlega víðtæk heimild sem verið er að gefa ráðherra og ætti að fara út úr reglugerðinni.

Varðandi 9. gr.

„Að hámarki er hverjum bát heimilt að hafa samanlagða teinalengd neta til hrognkelsaveiða allt að 3.750 metra á vertíð. Netalengd miðast við teinalengd (efri tein/flottein nets). Hverjum bát er einungis heimilt að nota net sömu teinalengdar á hverri grásleppuvertíð...”

Það er ljóst að ef menn ætla að halda í þessa lengd, þ.e. 3.750 metra, verður grundvelli kippt undan útgerð margra grásleppubáta. Í fyrra var 7.500 metra í teinalengd, í þessu samhengi þá var árið 2013 3.450 metrar á mann eða 10.350 metrar miðað við þrjá menn. Þessar tölur eru miðað við þá fellingu er við notum. En þetta var síðasta árið sem miðað var við 300 net í sjó miðað við 60 faðma áfellda slöngu en þá voru einnig gefnir 50 dagar í byrjunartíma. Þannig að þetta er ekki í fyrsta skiptið sem við liggjum undir hnífnum. Ef við miðum við þessar tölur þá er rökrétt að einn verði á hverjum bát. Er eitthvert vit í þessu? Á sama tíma er verið að hvetja menn til að sinna netum betur og róa stífar.

Það má vera að margir sjái rómantík í ólympísku sóknarkerfi á grásleppu en eins og málin hafa þróast í greininni á undanförunum árum þá tel ég að tími sóknarkerfis sé liðinn. Það er búið að þrengja að útgerðum á allan hátt, hvort sem varðar teinalengd eða dagafjölda. Sumar vertíðir hefur verið bætt við dögum þegar margir bátar hafa verið búnir að draga upp netin og jafnvel byrjaðir að skera af.

Kvótasetning er að ég held mun vænlegri leið til að stjórna veiðunum og aflamark yrði gefið út 1. september eins og í öðrum tegundum.

Fyrir hönd ST 2 ehf og Blæju sf.

Halldór Logi Friðgeirsson